

四庫全書

史部

欽定四庫全書

史部

蜀中廣記卷六十二

五至

詳校官編修

臣

翟槐

編修

臣

程嘉謨覆勘

總校官庶吉士

臣

何思鈞

校對官學正

臣

陳木

謄錄舉人

臣

曹勲祖

欽定四庫全書

蜀中廣記卷六十二

明 曹學佺 撰

方物記第四

牡丹

陸游云牡丹在蜀天彭爲第一天彭之花皆不詳其所自出土人云曩時永寧院有僧種花最盛俗謂之牡丹院春時賞花者多集於此其後花稍衰人亦不復至崇

寧中州民宋氏張氏蔡氏宣和中石子灘楊氏皆嘗買
洛中新花以歸自是洛花散於人間花戶始盛皆以接
花爲業大家好事者皆竭其力以養花而天彭之花遂
冠兩川今惟三井李氏劉村母氏城中蘇氏城西李氏
花特盛又有餘力治亭館以故最得名至花戶連畛相
望莫得其姓氏也天彭三邑皆有花惟城西沙橋上下
花尤超絕由沙橋至壩口崇寧之間亦多佳品自城東
抵濛陽則絕少矣大抵花品近百種然著者不過四十

而紅花最多紫花黃花白花各不過數品碧花一二而已今自狀元紅至歐碧以類次第之所未詳者姑列其名於後以待好事

狀元紅 祥雲 紹興春 膳脂樓 玉腰樓

金腰樓 雙頭紅 富貴紅 一尺紅 鹿胎紅

文公紅 政和春 醉西施 迎日紅 彩霞

疊羅 勝疊羅 瑞露蟬 乾花 大千葉

小千葉

右二十一品紅花

紫繡毬

乾道紫

潑墨紫

葛巾紫

福嚴紫

右五品紫花

禁苑黃

慶雲黃

青心黃

黃氣毬

右四品黃花

玉樓子

劉師哥

玉覆盆

右三品白花

歐碧

右碧花

轉枝紅

朝霞紅

灑金紅

瑞雲紅

壽陽紅

探春毬

米囊紅

福勝紅

油紅

青絲紅

紅鷺毛

粉鷺毛

威金毬

間綠樓

銀絲樓

六對蟬

洛陽春

海芙蓉

膩玉紅

內人嬌

朝天紫

陳州紫

袁家紫

御衣紫

靳黃

玉胞肚

勝瓊

白玉盤

碧玉盤

界金樓

樓子紅

右三十一品未詳

洛花見紀於歐陽公者天彭往往有之此不載載其著
於天彭者彭人謂花之多葉者京花單葉者川花近歲
尤賤川花賣不復售花之舊裁曰祖花其新接頭有一
春兩春者花少而富至三春則花稍多及成樹花雖益
繁而花葉減矣狀元紅者重葉深紅其色與輕紅淺緋
相類而天姿富貴彭人以冠花品多葉者謂之第一架
葉少而色稍淺者謂之第二架以其高出衆花之上故

名狀元紅或曰舊制進士第一人即賜茜袍此花如其色故以名之祥雲者千葉淺紅花妖豔多態而花葉最多花戶王氏謂此花如朶雲狀故謂之祥雲紹興春者祥雲子花也色淡泞而花尤富大者徑尺紹興中始傳大抵花戶多種花子以觀其變不獨祥雲耳臙脂樓者深淺相間如臙脂染成重趺累萼狀如樓觀色淺者出於新繁勾氏色深者出於花戶宋氏又有一種色稍下獨勾氏花爲冠金腰樓玉腰樓皆粉紅花而起樓子黃

白間之如金玉色與臘脂樓同類雙頭紅者並帶駢萼
色尤鮮明出於花戶宋氏始秘不傳有謝主簿者始得
其種今花戶往往有之然養之得地則歲歲皆雙不爾
則間年矣此花之絕異者富貴紅者其花葉圓正而厚
色若新染謝時他花皆落獨此抱枝而槁亦花之異者
也一尺紅者深紅頗近紫色花面大幾尺故以一尺名
之鹿胎紅者鶴頂紅子花色紅微帶黃上有白點如鹿
胎極化工之妙歐陽公花品有鹿胎花者乃紫色與此

頗異文公紅者出於西京潞公園亦花之麗品其種傳
蜀中遂以文公名之政和春者淺粉紅花有絲頭政和
中始出醉西施者粉白花中間紅暈狀如酡顏迎日紅
與醉西施同類淺紅花中特出深紅花開最早而妖麗
奪目故以迎日名之彩霞者其色光麗爛然如霞疊羅
者中間瑣碎如疊羅紋勝疊羅者差大於疊羅此三品
皆以形而名之瑞露蟬亦粉紅花中抽碧心如合蟬狀
乾花者粉紅花而分蟬旋轉其花亦異大千葉小千葉

皆粉紅花之傑者大千葉無碎花小千葉則花萼瑣碎故以大小別之此二十一品皆紅花之著者也紫繡毬一名新紫花蓋魏花之別品其花開正如繡毬狀亦有起樓者爲天彭紫花之冠乾道紫色稍淡而暈紅出未十年潑墨者新紫之子花也單葉深黑如墨歐陽記有葉底紫近之葛巾紫花圓正而富麗如世人所戴葛巾狀福嚴紫亦重萼紫花其葉小於紫繡毬莫詳所以得名按歐陽所紀有玉版白出於福嚴院土人云此花亦

自西京來謂之舊紫花豈亦出於福嚴耶禁苑黃蓋姚黃之別品也其花閒淡高秀可亞姚黃慶雲黃花葉重複郁然輪囷以故得名青心黃者其花心正青一本往往有兩品或正圓如毬或層起成樓子亦異矣黃氣毬者淡黃檀心花葉圓正腹背相承敷腴可愛玉樓子者白花起樓高標逸韻自然是風塵外物劉師哥者白花帶微紅多至數百葉纖妍可愛莫知所以得名玉覆盆者一名玉炊餅蓋圓頭白花也碧花止一品名曰歐碧其

花淺碧而開最晚獨出歐氏故以姓著大抵洛中舊品
獨以姚魏冠天彭則紅花以狀元紅爲第一紫花以紫
繡毬爲第一黃花以禁苑黃爲第一白花以玉樓子爲
第一然花戶歲益培接新特間出將不止此而已好事
者尚屢書之

天彭號小西京以其俗好花有京洛之遺風大家種至
千本花時自太守而下往往即花盛處張飲幣幕車馬
歌吹相屬最盛於清明寒食時在寒食前者謂之火前

花其開稍久火後則易落最喜陰晴相半時謂之養花
天裁接剔治各有其法謂之弄花其俗有弄花一年看
花十日之語故大家例惜花可就觀不敢輕剪蓋剪則
次年花絕少惟花戶則多植花以牟利雙頭紅初出時
一本直至三十千祥雲初出亦直七千八千今尚兩千
州家歲常以花餉諸臺及旁郡蠟蒂筠籃旁午于道予
客成都六年歲常得餉然率不能絕佳淳熙丁酉歲成
都帥以善價私售於花戶得數百苞馳騎至成都露猶

未晞其大徑尺夜宴西樓下燭焰與花相映影搖酒中
繁麗動人嗟乎天彭之花要不可望洛中而其盛已如
此使異時復兩京王公卿相築園第以相誇尚予幸得
與觀焉其動蕩心目又宜何如也明年正月十日山陰
陸游書

胡元質成都牡丹記云大中祥符辛亥春府尹任公中
正宴客大慈精舍州民王氏獻一合歡牡丹公即命圖
之士庶創觀闌咽終日蜀自李唐後未有此花凡圖畫

者唯名洛陽花僞蜀王氏號其苑曰宣華權相勲臣競起第宅上下窮極奢麗皆無牡丹惟徐延瓊聞秦州董成村僧院有牡丹一株遂厚以金帛歷三千里取至蜀植于新宅至孟氏於宣華院廣加栽植名之曰牡丹苑花至盛矣有深紅淺紅深紫淺紫淡黃鈺黃潔白正暈倒暈金含稜銀含稜旁枝副搏合歡重臺至五十葉面徑七八寸有檀心如墨者香聞至五十步蜀平花散落民間小東門外有張百花李百花之號皆培子分根種

以求利每一本或獲數萬錢宋景文公祁帥蜀彭州守
朱君公綽始取楊氏園花凡十品以獻公在蜀四年每
花時按其名往取彭州送花遂成故事公於十種花尤
愛重錦被堆嘗爲之賦蓋它園所無也牡丹之性不利
燥濕彭州丘壤既得其中又土人種蒔偏得法花開有
至七百葉面可徑尺以上今品類幾五十種繼又有一
種色淡紅枝頭絕大者中書舍人程公厚倅是州目之
爲祥雲其花結子可種餘花多取單葉化本以千葉花

接之千葉花來自洛京土人謂之京花單葉時號川花爾
景文所作贊別爲一編其爲朱彭州賦牡丹詩有蹄金
點鬢璋玉鏤跗之句今西樓下數欄花不甚多而彭州
所供率下品范公成大時以錢買之始得名花提刑程
公沂預會歎曰自離洛陽今始見花爾程公故洛陽人
也

彭守朱公綽與宋景文公唱酬牡丹詩仁帥安全蜀祥
葩育至和地寒開既晚春曙力終多翠帟遮蜂蝶朱欄

隔綺羅殷勤憑驛使光景易蹉跎宋祁答云珍蕪分清
賞飛郵附翠籠蹄金點鬢密璋玉鏤跗紅香惜持來遠
春應摘後空玩詩仍把酒恨不與君同范成大牡丹詩
西樓第一紅多葉東苑無雙紫壓枝夢裡東風忙裡過
蒲團藥鼎髻成絲又清明日試新火作牡丹會詩再
鑽巴火尚浮家去國年多客路賒那得青烟穿御柳且
將銀燭照京花香鬟半醉斜枝重病眼全昏霧障遮錦
地繡天春不散任教簷雨捲泥沙按天彭牡丹今已

寥寥成都惟汶川郡邸好植牡丹已累世矣故此花特
盛而蜀藩不敢與之較黃碧二色絕無紅者曰魚血紅
播州紅最著然亦隣于紫有平頭紫者頭有九合爲一
朶可得徑尺有五樹高亦可得丈計者予江南所未見
也醉西施則與江南同之紅者一種曰雀翎紅亦有斑
點大抵如譜中所稱鹿胎紅耳白者一種與鶴翎俱單
葉其神不王也予以庚戌歲汶川府中看牡丹作詩一
首去歲入川花事闌今年花發倍尋看王家好客來浮

白國色傾城是牡丹風景不輸洛陽盛雪澌遙映汶江
寒沈沈歌舞日向夕璧月金鐙明畫欄又蜀府園中看
牡丹云錦城佳麗蜀王宮春日遊看別苑中水自龍池
分處碧花從魚血染來紅平臺不到林間日曲岸時迴
洞口風盡道今年當大有妨行樂與人同龍池即古
摩訶池也

海棠

寰宇記云成都海棠樹尤多繁艷未開如朱砂爛漫稍

白半落如雪古今記府治西海棠樓唐李回建監司花
時燕集吟賞于茲

益部方物略海棠大抵數種又時小異惟其盛者則重
葩疊萼可喜非有定種也始濃稍淺爛若錦章北方所
植率枝強花瘠殊不可玩故蜀之海棠誠爲天下奇豔
云贊曰修柯柔蔓濃淺繁總盛則重葩不常厥種

嘉州志云海棠花以紫綿色者爲正餘皆棠梨耳產嘉
州者有香而本大有黃海棠色黃貼幹海棠花小而鮮

垂絲海棠色粉紅向下皆無子非真海棠也

冷齋夜話云有人調官都下踰年始得昌守已而求易
便郡有彭淵才者聞而往謁曰昌佳郡也聞官欲易地
誤矣曰俸給優乎曰否訟簡乎曰否然則奚誤淵曰海
棠患無香獨靜南者有香非佳郡而何故昌號海棠香
國土人云地宜此花易植易蕃郡治香霏堂一老樹重
趺疊萼每花或二十餘朵花氣醲郁餘不能及也孔平
仲談苑載淵才詠海棠有雨過溫泉妒妃子露濃湯餅

試何郎之句

宋沈立海棠記序云蜀花稱美者有海棠焉而記牒多
不錄嘗聞真宗御製後苑雜花十題以海棠爲首章賜
近臣唱和則知海棠足與牡丹抗衡稱獨步於西州矣
因摻擇前志惟唐相賈元靖耽著百花譜以海棠爲花
中神仙誠不虛美耳近世名儒巨賢發于歌詠清辭麗
句往往而得立慶厯中爲縣洪雅春多暇日地富海棠
幸得爲東道主惜其繁艷爲一隅之滯卉作海棠記敘

其大槩好事者幸無誚焉棠之稱甚衆詩有蔽芾甘棠
有杕之杜爾雅釋木曰杜甘棠郭璞註今之杜梨也杜
赤棠白呂氏春秋曰果之美者棠實又俗說有地棠棠
梨沙棠味如李無核較是數說俱非謂海棠也酉陽雜
俎引李贊皇言花名中之帶海者乘從海外來故知海
櫻海柳海石榴海木瓜之類俱無聞於記述豈以多而
無稱耶亦非多也誠恐近代始得之于海外耳又杜子
美海櫻行云欲栽北辰不可得惟有西域胡僧識若然

則贊皇之言不誣矣海棠雖盛稱於蜀而蜀人不甚重
今京師江淮尤競植之每一本價不下數十金勝地名
園目爲佳致而出江南者復稱之曰南海棠大抵相類
而花差小色尤深耳棠性多類梨核生者長遲逮十數
年方見花都下接花工多以嫩枝附梨而贅之則易茂
種宜壚壤膏沃之地其根色黃而盤勁其木堅而多節
其外白而中赤其枝柔密而修暢其葉類杜大者縹綠
色而小者淺紫色其紅花五出初極紅如臘脂點點然

及開則漸成纈暈至落則若宿粧淡粉矣其蒂長寸餘
淡紫於葉間或三萼至五萼爲聚而生其蓋如金粟蓋
中有鬚三如紫絲其香清酷不蘭不麝其實狀如梨大
如櫻桃至秋熟可食其味甘而微酸茲棠之大概也

唐羊士諤謝成都從事蕭員外寄海棠花詩云珠履行
臺擁附蟬外郎高步似神仙陳詩今見唐風盛從事遙
瞻衛國賢擲地好辭凌綵筆浣花春水膩魚箋東山芳
意須同賞子著囊盛幾日傳

唐吳融詩太尉園前兩樹春年年奔走探花人今來獨
傍荆山看回首長安落戰塵又雲綻霞鋪錦水頭占春
顏色最風流若教更近天街種馬上多逢醉五侯融出
蜀後追詠棠梨花詩蜀地從來勝棠梨第一花更因無
軟弱別自有妍華不貴綃爲霧難降綺作霞移須歸紫
府駐合餌丹砂密映彈琴宅深藏賣酒家夜宜紅蠟照
春稱錦筵遮連廟魂棲望飄江宇遶巴未饒酥點薄兼
如雪飛斜舊賞三年斷新时期萬里賒長安如種得誰定

牡丹誇

唐薛能詩酷烈復離披
立功莫我知
青苔浮落處
暮柳間開時
帶醉遊人插
連陰被叟移
晨前清露濕
晏後惡風吹
香少傳何許
妍多畫半眉
島疏連水脉
庭綻粒松枝
偶汎因沈硯
閒飄欲亂碁
遶山生玉壘
和郡徧坤維
負賞慙休飲
牽吟分失飢
明年應不見
留此贈巴兒
鄭谷擢第後入蜀見海棠盛開詩
云上國休誇紅艷杏
深溪自照綠苔磯
一枝低帶流鶯睡
數片狂和舞蝶飛

堪恨路長移不得可無人與畫將歸手中已有新春桂
多謝烟香更入衣又詩濃澹方春滿蜀鄉半隨風雨斷
鶯腸浣花溪上堪惆悵子美無心爲發揚

自註杜工部
老於西蜀詩

集中無海

崇故云

薛濤和李太尉棠梨花詩吳均蕙圃移嘉木正及東溪
春雨時日晚鶯啼何所爲淺深紅膩壓繁枝

崔塗題海棠圖海棠花底三年客不覺海棠花盛開却
向江南見圖畫始慙虛到蜀中來

沈立海棠詩序云英韶在前徒矜下里之曲風雅未喪
豈係擊轅之音不圖綴綺靡之辭抑將導溫厚之旨耳
詩曰岷蜀地千里海棠花獨妍萬株佳麗國二月艷陽
天叢萼勻如布修蕤巧似編彤雲輕點綴赤玉碎雕鐫
瑟瑟光輸瑩猩猩血借鮮淺深相向背疎密遞勾牽輕
倩重重染丹砂細細研藥纖金粟拱鬚嫩紫絲拳紅蠟
隨英滴明璣著顆穿初莖爭裊娜翹榦共踟躕絕代知
無價生香不減錢分靈應桂苑鍾粹定星躔木帝經邦

相花王入室賢祥飈加翦拂卿霑共陶甄真宰陰推轂
幻芒與著鞭不須憂薄命好爲惜流年贊翼施生柄扶
持煦嫗權主張韶令正調變淑威宣和氣高低洽芳心
次第還金釵人十二珠履客三千雲雨迷巫峽風波怨
洛川娉婷宜住楚妖冶合居燕綉被通宵展華燈徹曙
燃橫披前檻外半出假山巔暗羨游蜂採偷輸蟻穴沿
瘦嫌蛛網纖柔怯女蘿纏蓄恨憑誰訊無言只自憐文
君酒壚畔揚子草堂前品格生來別風流到老全繁中

生悵望衆裏見喧闐暄暖精神出精明意能便關關鶯
對語兩兩燕高騫天上宜封殖人間偶佇延共梭圍別
館與杏擁斜阡清曉簾爭卷黃昏幕尚寒低籠金輶輶
高映畫鞦韆忽認梁園妓深疑閨苑仙匆匆來蕙圃遠
遠別芝田羞隱冥濛霧輕如淡蕩烟乍逢開羽扇初喜
下雲軒髣髴迴星厖依稀帶翠鈿五銖衣宛轉七寶帳
翩翩獨立挨霓節成行列彩旃困宜歌琥枕步好襯金
蓮舞定休迴袖粧濃不傳鈿蓋張松鬱鬱茵藉草芊芊

馥郁蘭供夢扶疎柳伴眠
軀輕彌綽約腰細更便嫋
姪
婉常顯若幽柔自洒然
侍兒羅白芷婢子列芳荃
口口
濃檀注腮腮薄粉填解圍
施葉幄買笑有榆錢
旖旎環
瑤席娑娑匝玳筵
嬌依屏曲曲泣對露涓涓
南陌輕埃
蔽東郊夕照連
幾時休縹緲從此識嬋娟
是處遺簪珥
誰家不管絃
妒姬貪恐失戲稚
惜何顛折閃搔頭
褪擎
挺約腕揔戴遮
鬟上鳳妝壓鬢邊
蟬汲引新懽聚消磨
宿忿蠲縱觀須倒穢
命宴必加箋
翻曲教歌媛更詞送

酒船鄉心須暫解病眼當時痊迢遞來油壁從容駐錦
韉雅宜交讓比穠與棟華聯不分參朱槿寧甘混木綿
醪醑潛失色躑躅敢差肩素柰思投迹天桃恥備員梧
桐愧金井芍藥濫花磚併壓辛夷俗潛排寶馬薦天恩
無久恃人寵莫長專布影交三徑敷榮遍一廛凝眸方
的的回首旋翩翩可忍驚飈挫胡煩急景煎珊瑚隨手
碎絳雪繞枝旋拂漢霞初散當樓月自圓飄零隨蠅蝶
散亂逐猗連灼灼龜城外亭亭錦水邊抱愁應慘感有

淚即潺湲午影迷蝴蝶朝寒怨杜鵑物情元倚伏人意
莫拘攀擢秀高羣木稱珍極八埏未開猶脉脉憂落固
惓惓莫著新文紀重尋舊譜箋共知紅艷好誰辨赤心
堅實可陪朱李根宜灌醴泉栽須隣竹栢樹莫繞烏鳶
恥託膏腴茂常隨富貴遷爲多猶底滯因遠尚述遑客
思易成亂心期未省愆畫思摩詰筆吟稱薛濤牋醉目
休頻送詩情豈易緣薛能誇麗句鄭谷賞佳篇止感芳
姿美那憐託地偏山經猶罕記方志未多傳巧詠憂才

竭冥搜得意顛遐陋寡真賞僻境忍輕捐抽秘慙非據
探奇敢讓先援毫敘名卉聊用放懷焉

宋子京詩序云蜀地海棠繁媚有思加膩幹豐條萼弱
可愛北方所未見諸公作詩流播西人予素好玩不能
自默然所道皆在前人陳跡中如國風申章亦無愧云
蜀國天餘煦珍葩地所宜濃芳不隱葉併艷欲然枝褰
綵分羣萼勻霞點萬蕤迴文錦成後夾煎燎烘時蜂藥
迎銜密鴛梢向坐危淺深雙絕態啼笑兩妍姿絳節排

煙竦丹缸落帶垂
童容翻畏薄
便面到邊遲

王晉卿詞錦城春色花無數
排比笙歌留客住
輕寒輕暖夾天乍
雨乍晴寒食路
花雖不語鶯能語
莫放韶光容易去
海棠開後月明前
縱有千金無買處
右調玉樓春按晉卿時爲漢州刺史

范致能詩云手開花逕錦城寨
浩蕩春風載酒過來歲
遊人應解笑甘棠
終少海棠多又詠蜀中垂絲海棠春
工葉葉與絲絲
怕日嫌風不自持
曉鏡爲誰妝未辦
沁

痕猶自濕臙脂又海棠詞云馬蹄塵撲春風得意笙簫
逐款門不問誰家竹祗揀紅粧多處燒銀燭碧鷄坊裏
花如屋燕王宮畔花成谷不須悔唱關山曲直爲海棠
也合來西蜀

陸游詠范希元園海棠詩云誰道名花獨故宮東城盛
麗足爭雄橫陳錦障闌干外盡吸紅雲酒醖中貪看不
辭持夜燭倚狂直欲擅春風拾遺舊詠悲零落瘦損腰
圍擬未工按故宮謂蜀燕王宮也又於驛舍見故屏風

畫海棠有感云成都二月海棠開錦繡裏城迷巷陌燕
宮最盛號花海霸國雄豪有遺跡又張園賞海棠詞園
即故宮也浪迹人間喜聞猿楚峽學劒秦川虛舟汎然
不繫萬里江天朱顏綠髮作紅塵無事神仙何妨在鶯
花海裏行歌閒送流年休笑放慵狂眼看閒房深院多
少嬋娟燕宮海棠夜宴花覆金船如椽畫燭酒闌時百
炬吹煙憑寄語京華侶幅巾莫換貂蟬右調漢宮春又
詞云錦里繁華壞宮故邸疊萼奇花俊客妖姬爭飛金

勒齊駐香車何須幙障幃遮寶杯浸紅雲瑞霞銀燭光
中清歌聲裏休恨天涯自註故蜀燕王宮海棠之盛爲
成都第一今屬張氏

魏華父燕王宮海棠詩云二十四番花信風川原何處
着繁紅逢人漫說燕宮舊廢址荒營暝靄空又次虞永
康十月海棠韻冷淡庭梅儼玉顏孤高翠竹聳修鬟如
何富貴天然質猶欲尋盟二友間其二春意何曾間四
時芸芸靜處錦成帷非闕造化呈新巧鈞播無心自不

知又次黃侍郎疇若滄江海棠云妙處東皇可得知溶
溶生意不停機雨寒日曝渾無賴憑仗陽和爲解圍其
二沙暖花香弄午晴苦撩詩思浩難禁偷閒不辨追年
少只有春風會此心其三爲憐一片曉雲紅未放千絲
暮雨濃調變陰陽賢岳牧滿川花意得春容其四慣踏
郊原浩蕩春重來春雨物俱新渠雖自有生生意把握
天機是主人其五帝恐嘉花不易成好風遲日故來承
繁紅錯眩漁人眼不識滄江有武陵其六指麾紅紫思

無濱抵當丹青筆有神百樹花間一編易主人意韻鎮
長新又次虞萬州滄江海棠韻維摩老子苗生菴門外
滄江綠正涵夜雨村村折花柳春風日日長桑蠶晚粧
才記海棠睡朝色俄看禁藥酣造化新功鎮如此撫詩
徃徃發余慙又次王茶馬韻三首一春風雨亂書堆挂
口林間未放開浩蕩和風褰客袂來看火樹簇池臺又
善惜花人盡倚闌不將榮悴等閒看繁華奪目春如醉
獨有懷人問考槃右二首清淑堂海棠又宅在道傍如

寶坊一奩明玉颺新妝當年共賞人何在萬里相思夢
寐香右一首王氏花屋海棠

李燾云成都施氏園海棠方盛覓酒徑醉時二月九日
詩云染根着色謝天公破睡猶禁一再風爲此徑須浮
大白老夫元自愛深紅

蜀人錙夢炎題秋日蜀棠絕句野棠青子來青鳥霜日
清妍欲近人忽見嬌然紅數萼故鄉愁思不勝春

白玉蟾垂絲海棠詞一夜清寒千紅曉燦春不曾知細看

何如醉時西子睡底楊妃盡皆蜀種垂絲晴日暖薰成
錦圍說與東風也須愛惜且莫吹飛

蜀中廣記卷六十二

欽定四庫全書

蜀中廣記卷六十三

明 曹學佺 撰

方物記第五

荔枝

蜀都賦曰旁挺龍目側生荔枝布綠葉之萋萋結朱實之離離迎隆冬而不凋常曄曄以猗猗南齊孔稚圭謝賜生荔枝啓曰綠葉雲舒朱實星映離離昔聞曄曄今

賭信西岷之佳珍諒東鄙之未識也

華陽國志江州縣有荔枝園至熟二千石常設厨膳命士大夫共會樹下食之南齊志曰龍眼荔枝出朱提南廣縣犍爲犍道縣隨江東至巴郡江州縣往往有荔枝樹高五六丈常以夏生其實赤可食龍眼似荔枝其實亦可食方輿云學士山在石照縣東五里直郡治之江樓山西北張氏有荔枝異本合榦唐文若曲端嘗賦之馬寰宇記涪州縣地頗產荔枝其味尤勝嶺表相傳城

西十五里有妃子園多荔枝當太真時以馬遞馱載七
日夜至京人馬多斃於路百姓苦之故杜牧之過華清
宮詩云長安回望綉成堆山頂千門次第開一騎紅塵
妃子笑無人知是荔枝來又晁說之詩荔枝一騎紅塵
後便有漁陽萬騎來謂此也然蜀中荔枝瀘叙之品爲
上涪州次之合州又次之涪州徒以妃子得名其實不
如瀘叙耳涪州圖經云州至長安有便路不七日可到
昔宋景文作方物畧言荔枝生嘉戎等州以去長安差

近疑卽爲妃所取蓋不知涪有妃子園又自有便路也
按蜀志補云高都山在梁山縣北山中民以種薑爲業
有古驛路乃天寶貢荔枝所經也

郡國志云僊人在施夷中最仁古所謂僊僮之富多以荔
枝爲業園植萬株歲收百五十斛敘州圖經云荔枝廳
卽倅廳有名萬朵紅最爲佳品又一本在尉廳一株四
柯西南一柯獨肉厚而味甘又云峯巖在宜賓西百里
山坡荔枝連袤多屬廖氏宋時此州因出荔枝煎老學

卷云游參成都議幕攝事漢嘉及見荔子熟時凌雲山
安樂園皆盛處糾曹何豫元立法曹蔡迨肩吾皆佳士
日與槃桓憶唐薛許昌亦嘗以成都幙來攝郡未久罷
去故其荔枝詩曰歲杪監州曾見樹時新入座但聞名
蓋恨不及時也每與二君誦之而爲致慨

杜甫詩憶過瀘戎摘荔枝青楓隱映石逶迤京華應見
無顏色紅顆酸甜只自知又詩草閣柴扉星散居浪翻
江黑雨飛初山禽引子哺紅果谿女得錢留白魚張籍

詩錦江近西烟水綠新雨山頭荔枝熟萬里橋邊多酒
家遊人愛向誰家宿鄭谷詩二京曾見畫圖中數本芳
菲色不同孤棹今來已徼外一枝烟雨思無窮夜郎城
近含香瘴杜宇巢低起暝風腸斷渝瀘霜霞薄不教葉
似灞陵紅又平昔誰相愛驪山遇貴妃枉教生處遠愁
見摘來稀曉奪江霞色晴欺瘴日威南荒何所戀爲爾
即忘歸

白傳種荔枝詩紅顆珍珠誠可愛白鬚太守亦何癡十

年結子知誰在自向庭前種荔枝又荔枝樓對酒詩荔枝
新熟雞冠色燒酒初開琥珀香欲摘一枝傾一盞西
樓無客共誰嘗又題郡中荔枝寄楊萬州云奇果標南
土芳林對北堂素華春漠漠丹實夏煌煌葉捧低垂戶
枝擎重壓牆始因風弄色漸與日爭光夕訝條懸火朝
驚樹點粧深於紅躑躅大較白檳榔星綴連心朶珠排
耀眼房紫羅裁襯殼白玉裏填瓢早歲曾聞說今朝始
摘嘗嚼疑天上味嗅異世間香潤勝蓮生水鮮逾橘得

霜臙脂掌中顆甘露舌頭漿物少尤珍重天高若渺茫
已教生暑月又使阻遐方粹液靈難駐妍姿嫩易傷近
南光景熱向北道途長不得充王賦無由寄帝鄉唯君
堪擲贈面白侶潘郎又重寄荔枝與楊使君時聞使君
欲種植故落句戲之云摘來正帶凌晨露寄去須憑下
水船映我緋衫渾不見對公銀印最相鮮香連翠葉真
堪畫紅透青籠實可憐聞道萬州方欲種愁君得喫是
何年又荔枝圖序云荔枝生巴峽間樹形團團如帷蓋

葉如冬青花如橘而春榮實如丹而夏熟柔如蒲桃核
如枇杷殼如紅繒膜如紫綃瓤肉潔白如冰雪漿液甘
酸如醴酪大略如彼其實過之若離本枝一日而色變
二日而香變三日而味變四日外色香味盡去矣

蔡君謨譜云荔枝之於天下唯閩粵南粵巴蜀有之漢
初南粵王尉佗以之備方物於是始通中國司馬相如
賦上林云荅還離支蓋夸言之無有是也唐天寶中妃
子尤愛嗜涪州歲命驛致時之詞人多所稱詠張九齡

賦之以託意白居易刺忠州既形於詩又圖而序之雖
髣髴顏色而甘滋之勝莫能著也洛陽取於嶺南長安
來於巴蜀雖曰鮮獻而傳置之速腐爛之餘色香味之
存者亡幾矣是生荔枝中國未始見之也今廣南州郡
與夔梓之間所出大率早熟肌肉薄而味甘酸其精好
者僅比東閩之下等

趙清獻詠提刑邢夢臣度支連理荔枝詩嘉陽天遠被
薰風荔子呈祥郡館中庇本莫將慈竹較媚時寧與瑞

蓮同並柯晝聳烟光動異幹霄空月影通奇木幸逢真
賞筆誰誇丹實一庭紅文與可謝任瀘州師中寄荔枝
詩有客來山中云附瀘南信開門得君書歡喜失鄙吝
筠籛包荔子四角具封印童稚瞥聞之羣來立如陣競
言此佳果生眼不識認相剪求拆觀顆顆紅且潤衆手
攫之去爭奪遞追趣貪多乃爲得廉恥曾不論喧鬧俄
頃間咀嚼一時盡空餘皮與核狼籍入煨燼黃魯直次
韻李任道食荔枝有感三首一錢不直程衛尉萬事稱

好司馬公白髮永無懷橘日六年悵悵荔枝紅今年荔
子熟南風莫愁留滯太史公五月照江鴨頭綠六月連
山柘枝紅舞女荔枝熟雖晚臨江照影自惱公天與威
羅粧寶髻更接猩血染殷紅天社任淵云山谷有戎州
鎖水磨厓留題云元符三年五月戊寅太守劉廣之率
賓僚來賞鎖江荔枝此詩當時所作曰六年悵悵者
自紹聖二年至是凡六見荔枝矣又詩王公權家荔枝
綠廖致平家綠荔枝試傾一盃重碧色快剝千顆輕紅

肥潑醅蒲萄未足數堆盤馬乳則同時誰能兼此勝絕
味唯有老杜東樓詩又詞憶昔謫巴蠻荔子親攀冰肌
照映柘枝冠日擘輕紅三百顆一味甘寒重入鬼門關
也似人間一雙和葉挿雲鬟賴得清湘燕玉面同倚欄
干右調掛金索又謝曹使君伯達書伏承手誨分惠荔
子色香動人眼鼻誠與山煙溪露俱來乃知夔峽荔枝
尤勝嶺南珍香春與之意無以爲喻也

元古杭徐昌綠荔亭記云敘南之西安邊里有銅山銅

山巨族爲廖氏其先世徙自蜀郡詩書行義爲鄉人所
敬交遊婚媾率顯者也家有荔枝兩株莫究所自植古
老相傳約百數十年物其盤飢偃蹇凌霄漢蔽日月就
下扁望之蒼然如垂天之雲傍有一亭夏暑煽爐實熟
葉密香聞數里廖氏耆耄以其暇率族人聚樂其間布
席列俎折實於盤少者以次奉觴爲壽畢則拱侍聽長
者之訓懽洽之至禮度不踰然世雖有荔枝未有實綠
而味甘者迨宋太史黃公食之驚異而有廖致平家綠

荔枝之句今尚見於豫章集中鄉里因名其亭曰綠荔
廖君樞童稚時與予同學京師今皆將五十矣持譜求
予爲斯亭記余見其歷世宦學相承治行尤著斯亭殆
將有聞於遠哉廖之後世子孫其尚培而葺之於無窮
可也按志亭在敘府西六十里徐爲中善左丞

方物略云隈枝生印州山谷中樹高丈餘枝修弱花白
實似荔枝肉黃膚甘可食大若爵卵贊曰挺榦既修結
蘢滋白戟外澤中甘可以食魏鶴山萬州魯池觀荔枝

詩曰分隨猿鶴老隈枝趨詔重來兩鬢絲邂逅一觴莫
辭醉能禁二十載差池則荔枝亦可以名隈支矣

梅

唐張說正朝折梅詩蜀地寒猶暖正朝發早梅偏驚萬
里客已復一年來時奉使在蜀也杜甫答裴迪登蜀州
東亭送客逢早梅相憶見寄詩東閣觀梅動詩興還如
何遜在揚州此時對雪遙相憶送客逢春可自由幸不
折來傷歲暮若爲看去亂鄉愁江邊一樹垂垂發朝夕

催人自白頭子美亦好種梅于江岸草堂間東坡詩云
拾遺被酒行歌處野梅官柳城西路當時猶及見之

趙閱道於鈴兵王閣使素芳亭賞梅詩素萼清香並酒
卮主人勤意囑留詩爲逢蜀國新開日却憶江南舊賞
時春密未通桃李信臘殘都放雪霜姿先公舊植亭欄
外肯構重來見本枝公又於鈴兵李左藏廳賞梅詩曰
歲晏珍林發素葩樽前竒賞著詩誇驚逢臘去已三日
喜見春初第一花照水冷容酥點綴搖風香片雪紛拏

主賓莫作尋常看錦里名園只兩家註云成都此花惟東西鈴廳爲盛也

黃山谷戎州與人帖昨日市中已見臘梅開者數枝矣
有詞曰疎蘂幽香禁不過晚寒愁絕那更是巴東江上
楚山千疊歌帽閒尋西瀼路彈鞭笑向南枝說恐使君
歸去侍鑾坡孤風月青鏡裏悲華髮山驛外溪橋側悽
然回首處鳳凰城闕憔悴如今誰領畧飄零已是無顏
色問行厨何日喚賓僚猶堪折右調滿江紅自註與夔

州崔三伯禮侍御同作

僞蜀王建梅苑有一老梅其大可庇一畝屈盤如龍予
訪之亦在草堂之西四十年前此梅尚在而今亡矣宋
馮時行梅林分韻詩即此梅也序云紹興庚辰十二月
既望縉雲馮時行從諸朋舊凡十有五人攜酒具出西
梅林林本王建梅苑樹老其大可庇一畝中間風雨剝
裂仆地上屈盤如龍孫枝叢生直上尤怪古者凡三四
酒行以舊時愛酒陶彭澤今作梅花樹下僧爲韻分題

賦詩客既占韻立者倚樹行者環繞仰者承薌頰者拾
英吟態不一皆可圖畫是行也余被命造朝行事薄遽
重以大府衣冠謁報主人饋勞酬對犇馳形神爲之俱
敝諸公導以斯游江流如碧玉平野秀潤竹塢桑疇連
延彌望民家十十五五籬落鷄犬比閭相親不愁不嗟
余散策其間蓋不知向之疲繭厭苦所在也昔人謀于
野則獲閒暇清曠有爽於精神思慮游不可廢如此哉
又况所與游皆西州名俊憲事者耶詩成次第不以長少

以所得韻之後先聯成軸客十有五韻止十四呂義父
別以詩字爲韻又有首眩詩不成者缺樹字一韻余過
沈犀樊允南監鎮稅語允南補之諸公又屬時行爲之
序十五人者成都楊仲約施子一呂周輔義父智父澤
父宇文德濟呂默夫杜少訥房仕成楊舜舉綿竹李無
變潼川于伯永正法寶印老云楊仲約得舊字竹村喜
紆徐江雲迷昏晝踟馬_上語嫩寒入衣袖天公惜梅
花破臘開未就端待使君來春風本依舊一尊既相屬

勿辭作詩瘦明年用和羹請爲使君壽李流謙得時字
巾冠墮城府桔槔無停時胃脾貯黃埃非復林壑姿涎
流方外勝秦人望軒羲萬金買閒日駕言一舒眉冒踏
衆俊場更從百代師食魚得河魴熊蹯佐其滋輟輟煙
雨村霜條出冰筴烏鵲噪寒暝玉立山差差置尊扶疎
下老榦虬蛟馳落藥不動塵初無犀駭雞羞我木石姿
鬬公瓊琚詞深酌起自勸滕莒吾封圻公行對宣溫雲
霧生攀躋能來玩墟落足馬却蓋麾蟠匄萬蟬螻區寰

眇毫絲以茲接羣動白羽坐指撫笑彼秦外者組紱爲
之鞿它年駟馬還梅花當十圍識此黃公壚下車挽客
衣未覺邈山河一醉也大奇呂及之得愛字去城十里
南郊外突兀老梅餘十輩玉雪爲骨冰爲魂氣象不與
凡木對我來窮冬煙雨晦把酒從公對公酹人言此實
升廟堂埋沒荒村今幾歲清芳不爲無人改捐弃何妨
本根在瑰章妙語今得公國色天香真有待歸路從公
中倒戴俗物污人非所愛我公行向日邊歸此段風流

入圖繪宇文師獻得酒字平生慕英游望公真山斗一
見開心誠已落諸人後龍門豈甄擇大小俱容受聯轡
尋勝踐春風倚尊酒惟公對江梅端若同志友玉色洗
塵沙幽姿出藜莠命客花下坐相與沃醇酎非公無此
客壁言諸草木臭向晚入深巷蒼根歆甕牖始知水西頭
卧梅勝卧柳有客三嘆息此樹警老醜一笑客誠癡萬
法要經久奇卉如尤物過眼不必有惠我終日香重來
香在否但從此理悟那復長搔首念公捧召節脩名當

不朽艤舟未忍去招尋訪林藪中心湛虛明外慕厭紛
糾杖屨循古岸細話猶開誘再拜誦公詩一洗芻豢口
楊大光得陶字蟠根寄荒絕擢榦空櫟慘鄉來聞妙語
剪拂到兒曹垂老猶巨堪開落幾徒勞不謂勤杖屨惠
然排蓬蒿尚能領諸生相就醉澄醪真賴旁輝映併覺
標韻高酒闌興未已分韻看揮毫籍湜俱可人冥搜爭
過褒乃知天地間一等爲賢豪橫飛與陸沈亦各係所
遭再煩起窮邊國柄行當操盡期如此花曉夕幸甄陶

得備和羹用寧不出伊咎百年幾春風勿令心忉忉于
格得彭字庭柯卧蒼虬閱世如瞬彭朔風破檀欒零露
滋玉英江空人響絕影落千丈清今代文章錄縉雲主
齊盟躍馬覘春色觴客江上亭三嗅韻勝華霜霰飽曾
經及時剝其實可用佐大烹幸因輜軒使錫貢充廣庭
王明儻子燭和羹登簋鏘僧寶印得澤字江路歲崢嶸
酸風更蕭瑟發興訪梅花主盟得詩伯孤芳有餘妍初
不帶脂澤香度竹籬短影搖谿水碧同時飲中仙着我

林下客春槽沸滴紅滿坐喧舉白澆胃獨茗盃臭味曾
不隔公今日邊去陛下正前席請看枝頭春中有和羹
實反騷試與提不礙心鐵石楊舜舉得今字蘭亭久陳
迹修竹空自陰龍山亦淒涼鮮花誰與簪英游曠千載
盛事新梅林四海馬黎州未妨鐵石心提攜到諸子徧
賞江之得房亭姑射仙玉立何森森謝氏六君子對飲
香滿襟西鄰訪老龍奇怪尤可欽宛然如先生高卧歲
月侵從茲飽薰風佳實共鼎鼐正味悅天下妙用無古

今去去好着鞭江南春已深
呂商隱得作字一樹知獨
秀十里方出郭江流浩清
泠露氣凝淒薄胡爲此行
色
疲馬亦踴躍玄冥正擅令
植物困搖落身心縱未改
佳
意久已惡喜見南北枝粲
然秀冰壑千林色輝映百
畝
香旁礪首破春風荒獨傲
清雪虐坐令芳信傳芬菲
到
羣萼如一君子信茹連俱
有託相期飲此意浩蕩放
杯
酌更應護攀拗嘉實須若
若終收調鼎功傳巖真可
作
持問緡雲老一尊笑相酢
馮時行得梅字霜朝馬蹄
無

纖埃錦城城西江之隈金蘭合沓俱朋來白沙粼粼江
水洄梅花傍江高崔嵬人言猶是王建栽豪華過眼浮
雲哉下馬酌酒聊徘徊飛英送香來酒杯酒酣疾呼竹
籬開走尋屋角如龍梅梅龍雖多此其魁睡龍屈盤肘
承胷風皺雨散封蒼苔孫枝迸出誰胚胎天公撫摩春
爲回慎勿變化隨風雷年年開花照尊罍我欲結茅買
芋煨與梅周旋送衰頽呂凝之得花字出郭豈憚遠滿
城無此花新枝開玉雪老樹卧龍蛇臨冰互葱蒨傍籬

忽橫斜詩聲寫奇怪畫本出槎牙老子晉彭澤諸公賈
長沙不尋桃李盟來嗅霜露華杖屨穿茆舍壺觴倩酒
家饑飡香馥郁醉藉影參差月白雁成字江清魚可叉
風流一時勝野意十倍加祗恐天上去迹陳錦江涯歸
來馬蹄疾驚飛滿林鷗樊廣漢曰沈黎使君與客飲王
建梅林分韻作詩過沈屏以詩相示闕樹字令廣漢補
之云牆頭冉冉新陽露忽作玲瓏玉千樹老蛟偃蹇獨
避人卷迴飛雪江臯暮何處鳴禽來好音四月枝垂起

黃霧摧折霜餘初不懼笑看春光等閒度百年夢幻欲
無言吹落吹開豈風故時來薦鼎真偶爾小住疎籬非
不遇我知天意絕茫茫無爲展轉獨多慮爲花悽斷却
回頭爾亦微酸苦難茹施晉卿得下字郊原宿雨餘雪
重雲垂野春信初動搖欲往豈無駕使君早着鞭問路
逢耕者深尋煙雨村共作詩酒社庭荒六老樹氣象自
儼雅一笑呼酒來大盆注老瓦最後看枯株何意當大
厦天矯待風雲有年天實假須知羹鼎調嘉實係用捨

我欲壽使君，鐫壘更傾瀉。明朝得楚騷，健甚無屈賈。君
今有賜環詔，落九天下。蜀江雪浪來，棹趲船人把。留滯
以諸生斯文，要陶冶惟應郢中歌。倡絕和自寡，更聞督
熊兒夜賦燭，餘爇它年看。無雙聲譽出江夏，却笑昌黎
公阿買字能寫。張積曰：馮先生訪梅于成都西郊，同游
十五人分韻哦詩，而積不與。翊日先生分僧字屬積作
之。云：春回九地陽，潛升南枝破。臘如酥凝疎，籬度香竹
梢。短寒沙倒影，溪流澄魁然。老株忽駭目，雪鱗矯矯雙。

龍騰天公一叱因仆地掀髯弄爪高曲肱長林望斷千
百株奮首直欲青雲凌黎州太守和羹手十里往看車
呼登西江破曉郊路淨盞簪者誰金蘭朋懽笑藉草飛
大白行厨載酒多於澠風花飄搖落杯面漱齒澆膏如
嚼冰湘流之清峴山瘦千古邂逅一笑興却踏東風急
回首侵夜霜月寒生稜入門未坐亟相詫曰今見之生
未曾成都勝事多四蜀我欲問津雲水僧先生功成早
勻身未老重來醉倚藤呂宜之得詩字寒梅如高人冰

雪凜風期霜威凌萬木孤芳綴疎枝古來歲寒心肯與
時節移家家浣溪南橫斜映疎籬老樹更崛竒矯矯蛟
龍姿中有調鼎味幾年江之湄征衫十里寒霜蹄快追
隨先生羊叔子到處英名垂對花有妙想豪氣無百卮
興來屬湛輩同出春容詩

潼川楊甲臘日游梅龍以雪後園林纔半樹爲韻得樹
字年年看梅水西路白頭溪翁眼如故重來笑龍老不
死我亦風埃憶歸去酒酣百怪入我腸夜半恍惚與龍

遇醉騎一尾天上歸陳迹江頭不知處梅花勸汝一杯
酒千歲一寒真旦暮欲將老大要風雪穴蟻窠虫已無
數成都萬事更奇古石笋猶疑卿相墓孔明廟前栢千
尺神物脩脩泣幽樹它時滅壞亦同趣人生誰能一長
顧浮雲天地不須論但願人間有詩句庚寅再遊詩云
霜郊馬頭鞭影西欲尋遠梅無舊蹊但聞草木皆有香
未到已識花前溪艤舟登岸入梅處竹樹煙火茅茨低
百年死樹虫蘚暗鱗甲漠漠僵橫寬老翁鼻祖頭雪白

下見兒女方勝筭數株無力已仆地強起放春花滿畦
瘦龍夭矯欲仙去脊尾一半埋沙泥雷公幾時獵幽蟄
夜半刀斧來剗剗野人往往多再拜疑有鬼物憑其栖
問樵訪牧不知歲髻亂已見今耄倪故人同游六七輩
或似醉阮林中嵇遼樹覓花不識路東邊犬吠西號雞
榼中但有酒清濁寒具野擔勤攜齋引之各各坐香樹
醉中採擷欲滿提誰言猶是蜀梅苑破丘斷壟生高藜
種花滿地作癡計隨手變化空塵翳只餘老樹香不滅

力戰風雨猶堅屏云何身槁心尚在花氣鬱鬱連雲霓
但印此香可飲酒笑取身世如稗稊竹寒沙碧夜來語
回首千載餘幽題榮枯過眼如一夢世網忽掛如牢狴
何時江村一曲路與子共賦歸來兮

陸放翁曰成都城南有故蜀主宣華苑多梅皆百餘年
物也作詞云斜陽廢苑朱門閉吊興亡遺恨淚痕裏淡
淡宮梅也依然點酥翦水凝愁處似憶宣華舊事行人
別有淒涼意折幽香誰與寄千里佇立江皋香難逢隴

頭歸騎音塵遠。楚天危樓獨倚。又詩云十里溫香撲馬。
來江頭。遠見去年梅。喜開剩欲邀明月。愁落先教掃綠。
苔。跌宕放翁新醉墨。淒涼廢苑舊歌臺。盛衰自古無窮。
事。莫向昆明歎劫灰。又於浣花溪賞梅詩。老子人間自。
在身。挿梅不惜損烏巾。春回積雪層冰裏。香動荒山野。
水濱。帶月一枝低弄影。背風千片遠隨人。石家樓上貪。
吹笛。肯放朝朝玉樹新。又看梅歸馬上作詩云。本爲梅。
花判獨飲。却嗔梅花消宿醒。日欲落時始上馬。青羊宮。

前聞發更范石湖在成都雨後東郭排岸司申梅開及
三分戲書小絕令一面開燕詩云雨入南枝玉蕊皴合
江雲冷凍芳塵司花好事相邀勒不着笙歌不肯春又
西郊尋梅詩西郊梅花矜絕豔走馬獨來看不厭似羞
流落蒙市塵寧墮荒寒傍茅店翛然自是世外人過去
生中差一念淺顰常鄙桃李學獨立不容鶯蝶覘山礬
水仙晚角出大是春秋吳楚僭餘花豈無好顏色病在
一俗無由砭朱欄玉砌渠有命斷橋流水君何欠嗟予

相與頗同調身容劒南家在剡淒涼萬里歸無日蕭颯
二毛衰有漸尚能作意晚相從爛醉不辭杯潑豔又於
合江亭隔江望瑤林庄梅盛開過江訪之馬上哦詩云
何處春能早疎籬浪激湍竹間煙雪迴馬上晚香寒喚
渡聊相覓巡簷得細看極知含雨意未許日烘殘

竹

揚雄蜀都賦其竹則鍾龍簰篴野篠禁鬯宗生族攢俊
茂豐美夾江緣山尋卒而起若此者方乎數十百里

左思賦云邛竹緣嶺又云邛杖傳節於大夏之邑山海經云邛崃山出邛竹杖又云邛都高節竹可爲杖所謂邛竹也

拾遺錄云老子當周之末居山與世人絕迹惟有黃髮友五人手杖青筇之杖出入室中與老子談

漢書張騫使大夏時見邛竹杖問所從來曰從東身毒國可數千里得蜀賈人市之蜀記曰騫奉使尋河源得高節竹植於邛山號曰邛竹今緣山皆是可爲杖矣

戴凱之竹譜曰邛竹高節實中狀如人剡俗謂之扶老
竹山海經補註云龜山多扶竹邛竹也高節實中中杖
亦名扶老竹歸去來詞策扶老以流憩即此晉王右軍
與周益州書去夏得足下致邛竹杖皆至此土人多有
尊老者皆即分布令知足下遠惠又云周益州送此邛
竹杖鄉尊長或須令送亦取扶老之意也

晉蘇彥邛竹杖銘曰安不亡危任在所杖秀矣雲竹勁
直篠蕩節高質貞霜雪彌亮圓以應物直以居當巧妙

無功奇不待匠君子是扶逍遙神王傳咸邛竹杖銘曰
嘉茲奇竹質勁體直立比高節示世矜式北周庾開府
邛竹杖賦云沈冥子遊巴山之岑取竹于北陰嫵娟高
節寂歷無心霜風古色露染斑深每與龍鍾之族幽翳
沈沈文不自殊質而見賞蘊諸鳴鳳之律制以成龍之
杖拔條勁直璘斌色滋和輪人之不重待羽客以相貽
青春欲暮白雲來遲謀于長者操以從之執耒而獻無
因自持諸蔗雖甘不可以倚彼藜雖實不可以美耒若

處不材之間當有用之始魯分以爵漢錫以年昔尚爾
齒今優我賢書橫几玉塵筵函之以後拂之以前爾其
摘芳林沼行樂軒除間尊卑之垂悅隨上下之遊娛夫
寄根江南森森幽潭傳節大夏悠悠廣野豈比夫接君
堂上之履爲君座右之銘而得與綺紳瑤珮出芳房于
蕙庭哉宋黃庭堅筇竹杖贊云厲廉隅而不劇故竊比
於彭聃之壽屈曲而有直體能獨立於雪霜之後伯夷
食薇而清陳仲嘖李而瘦涪翁晝寢蒼龍掛壁涪翁履

危心如鐵石窮山獨行解兩虎爭終不使下莊乘間而
孺子成名又筇竹杖頌云偉邛崃之美竹初發跡於猗
柯有山而不險有水而無波金聲而玉節故貫四時而
不改其柯郭子遺我扶余澗阿坐則倚胡牀斐几行則
隨青笠綠蓑吾衰也久矣視爾畏友子琢子磨百世以
俟聖人而不惑則涪皤不負筇竹危而不扶顛而不持
惟邛竹之負涪皤也

巴國志竹木之蹟則有靈壽桃枝桃枝竹屬也竹譜云

桃枝竹皮滑而黃可以爲席今渝瀘合三州有桃竹簟
即此物杜甫桃竹杖贈章留後詩江心蟠石生桃竹蒼
波噴浸尺度足斬根削皮如紫玉江妃水仙惜不得梓
潼使君開一束滿堂賓客皆歎息憐我老病贈兩莖出
入爪甲鏗有聲老夫復欲東南征乘濤鼓枻白帝城路
幽必爲鬼神奪拔劍或與蛟龍爭重爲告曰杖兮杖兮
爾之生也甚正直慎勿見水踴躍學變化爲龍使我不
得爾之扶持滅跡於君山湖上之青峯噫風塵瀕洞兮

豺虎咬人忽失雙杖兮吾將曷從

益州方物略云慈竹性叢產根不外引其密間不容筍
筍生夏秋閱歲枝葉乃茂別有數種節間容八九寸者
曰籠竹一尺者曰苦竹筍稍垂地者曰釣絲竹或取節
修膚緻者用爲簞笠贊曰根不他引是得慈名中實外
堅筍不時萌末或下垂再弱緣縈元微之和東川李相
公十二韻詩慈竹不外長密比青瑤華予攢有森束玉
立無蹉跎纖粉妍膩質細瓊交翠柯亭亭霄漢近靄靄

雨露多冰碧寒夜聳簫韶風畫羅煙含朧朧影月泛鮮
鮮波鸞鳳一已顧燕雀永不過幽姿媚庭實顥氣爽天
涯峻節高轉露貞筠寒更佳託身仙壇上靈物神所呵
時與天籟合日聞陽春歌應憐孤生者摧折成病痾唐
吳筠慈竹賦云廣漢山谷有竹名慈生必向內示不離
本修莖巨葉攢根沓柢叢之大者或至百千株而紫結
踰乎咫尺好事君子徙爲階庭之翫焉吁嗟非此土所
有乃有厭流俗之譏動鄉闔之思者蓋撫高節而興感

覽佳名而思歸遂爲賦曰有竹猗猗生于高陂左連瑤
帶右雜瓊枝恨幽客之方賞嗟君侯之不知徙蔚丹谷
遷榮綠池氣凜凜而猶在色蒼蒼而未離屈巖壑之容
貌充堦庭之羽儀爾其劃地分域駢陰抗趾疊榦龍迴
攢根鳳峙防碧落於霄末翳紅光於夕始崇柯振而烟
靄生繁葉動而風颭起擁涼砌之晨肅屏炎扃之晝澤
至若白藏載謝玄英肇切塞北河堅江南地裂觀衆茂
之咸悴驗貞輝之獨潔抽勁絲以垂霜總嚴青而負雪

蓋同類之常稟非殊方之異節若乃宗生族茂天長地
久萬抵爭盤千株競糾如母子之鈎帶似閨門之悌友
恐孤秀而成危每羣居而自守何美名之天屬而和氣
之冥受嗟乎道之存矣物亦有之不背仁以貪地不藏
節以遁時故其貞不自炫用不見疑保夷險之無易晒
榮枯之有期俄蓬轉於岷徼遂萍流於江汜分兄弟於
兩鄉隔晨昏於萬里撫貞容而骨魄伏嘉號而心死庶
因感而長懷遂策情而勵已唐喬琳慈竹賦云維竹稱

慈幾乎有知九族敦敘孝友威儀是竹必滋五服相殘
骨肉攜離是竹必衰苟自家而刑國亦觸類而增思莽
尊固護檀欒櫛比如束之稠如插之密勁節中聳攢根
內實聲唯戛風影不透日類宗族之親比同朋友之造
膝至若暮歲窮律霜凝雪霏陶鈞無發生之理松栢有
後凋之期是竹也叢篁劈開牙筍怒長紫籜連披青筠
紛上有偕老之情感饋親之養如受制於籬界不旁侵
於土壤雨露之澤謝爾衆芳細葉未吐貞心已長恥高

標而迴出斯裏曲而不揚匪趨時於律候寧隨韻於笙
簧保無用而以道自將愧不才而與物俱昌苟成陰於
隙地作盛景之清涼重曰夫絲絲瓜瓞兮知有子母邕
邕鴻鴈兮如次弟兄於家則疏附禦侮於國則磐石維
城田氏不分庭之荆陳家則應天之星莫不鬱映棠棣
急難鵲鳩斯竹也共根連茹一本千莖年深轉密歲晚
彌榮一可以厚骨肉一可以敦友生於靈臺而莫非信
性彰慈孝而感通神靈吳曾云國初樂史子正慈竹詩

數十韻首云蜀中何物靈有竹慈爲名一叢濶數步森
森數十莖高低相倚賴渾如長幼情余按任昉述異記
南中生子母竹今之慈竹也乃知不獨蜀中

杜少陵從韋二明府續處覓綿竹三數叢詩華軒藹藹
他年到綿竹亭亭出縣高江上舍前無此物幸分蒼翠
拂波濤

黃魯直對青竹賦云余楚產也閱東南之竹多矣未嘗
聞對青竹者也嘉州僧從之苞封見貽藝之而成乃初

識之惟範圍之內有知之物一無窮無知之物一無窮
一耳一目不能遍攬也況六合之外者乎感而賦之云
爾竹之美於東南以節不以文也其在楚之西鬱鬱蔥
蔥連山繚雲也會稽之奇材任矢石蘄春之澤夏簞簫
笛沅湘淚血邛崃高節慈竹相守孝竹冬茁慈姥嶰谷
笙竽篳篥長石之山一節可航猶未極其瑰怪不常也
故吳楚無竹工非無竹工婦能織緝之器兒能鷄鶩之
籠也今夫宮篴篥篥篴篥篴篥篴篥篴篥篴篥篴篥篴篥

之則律呂汗簡賤之則箕帚蒸薪唯所逢遭盡於斧斤
美哉斯竹黃質墨章如出杼軸織文自當解甲稅枯金
碧其相歲寒在躬又免斲烹彼其文章之種性不可致
詰創心而求之不可得剗根而求之不可得匪人匪天
有物有則惟其與蓬蒿共盡而無憾余亦不知白駒之
過隙按長春競辰稿此竹謂之黃金嵌碧玉云

益州方物略云方竹者圓衆方寡而方者最貴差少贊
曰竹箇皆圓此獨方形厚倍于竅紉節稜稜

又云紫竹蜀諸山中尤多園池亦種爲玩然生二年色乃變三年而紫贊曰竹生三歲色乃變紫伐榦以用西蜀之美

梁天監起居注云十六年連理竹生益州郫縣王家園外連理並榦涪州志黃葛峽有相思崖昔有童子卅女相悅交贈今竹有桃釵之形笋有柔麗之異崖曰相思崖竹曰相思竹嘉州志產月竹月生笋故名淳熙十一年十二月夔州帥永嘉劉公猶子某夜夢庭生瑞竹旦

起見問道堂之東十節而上岐然雙榦與夢合符公因
爲之賦勸農事陳季習爲記又作巴曲九章以歌之此
皆竹之異也

詩義疏云筍皆四月生惟巴竹筍八月生盡九月成都
有之簞冬夏生始數寸可煮以苦酒浸之可下酒及食
又可采藏及乾以待冬月也本草四川敘州宜賓長寧
所出苦筍彼人重之癸辛雜識曰涪翁喜苦筍嘗從黃
斌老乞之有詩云南園苦筍味勝肉籜龍稱寃莫採錄

煩君更致蒼玉束明日風雨吹成竹又和坡翁春菜詩
云公如端爲苦筍歸明日青衫誠可脫坡得詩戲語坐
客云吾固不愛作官魯直遂欲以苦筍硬差致仕聞者
絕倒其苦筍賦有忠諫活國之語放翁又從而獎之云
我見魏徵殊無媚約束兒童勿多取於是世以諫筍目
之殊不知翁嘗自跋云余生長江南里人喜食苦筍試
取而嘗之氣苦不可於鼻味苦不可於口故嘗屏之未
始爲客一設及來黔中黔人各掘苦筍萌於土中才一

寸許味如蜜蔗初春則不食惟黠道人食苦筍四寸餘
日出土尺餘味猶甘苦相半以此觀之涪翁所食乃取
其甘非貴乎苦也魯直苦筍賦云黠道苦筍冠冕兩川
甘脆愜當小苦而反成味溫潤鎮密多啖而不疾人蓋
苦而有味如忠諫之可活國多而不害如舉士而皆得
賢是其鍾江山之秀氣故能探雨露而避風煙食肴以
之開道酒客爲之流涎彼桂班之夢永又安得與之同
年蜀人曰苦筍不可食食之動痼疾令人萎而瘠予亦

未嘗與之言蓋上士不談而喻中士進則若信退若炫
焉下士信耳而不信目其頑不可鑄故李太白謂但得
醉中趣勿爲醒者傳

方物略云櫻竹性亦叢產葉似櫻有刺徑不三二寸或
曰桃竹未得其詳贊曰葉櫻身竹族生不蔓有皮無枝
實中而榦

左思蜀都賦櫻杼楔縱註云櫻杼出蜀郡其皮可作繩
履杜甫枯櫻詩蜀門多櫻櫚高者十八九其皮剝剝甚

雖衆亦易朽徒布如雲葉青青歲寒後交橫集斧斤凋
喪先蒲柳傷時苦軍乏一物官盡取嗟爾江漢人生成
復何有有同枯櫟木使我沈歎久死者即已休生者何
自守啾啾黃雀啁側見寒蓬走念爾形影乾摧殘沒藜
莠文彥博詩哆熾風葉張困皴雨皮厚叢櫟列蓋端攢
旄注旗首物以稀見珍材緣怪忘醜東坡云櫟筍狀如
魚剖之得魚子味如苦筍而加甘芳蜀人以饌佛僧甚
貴之而南方不知也筍生膚毳中蓋花之方朵者正二

月間可剝取過此苦澀不可食矣取之無害於木而宜於飲食法當蒸熟所施略與筍同蜜煮酢浸可致千里外今以餉殊長老詩曰贈君木魚三百尾中有鶯黃子魚子夜叉剖癭欲入甘籥龍藏頭敢言美願隨蔬果得自用勿使山林空老死問君何事食木魚烹不能鳴固其理

方物略海櫟大抵櫟類然不皮而榦葉叢于杪至秋乃實似棟子今城中有四株緻而堅風雨不能撼贊曰櫟

皆褫皮此獨自榦攢葉于顛燾首披散秋華而實其植
則罕杜甫海椶行左綿公館清江濱海椶一株高如雲
龍鱗犀甲相錯落蒼稜白皮十道文自是衆木亂紛紛
海椶焉知身出羣移栽北辰不可得時有西域胡僧識
趙清獻咏府庭海椶詩云海椶根榦出枰櫟雙勢凌空
劍外無長鎖荆榛嗟廟栢不禁風雨咲庭梧胡僧過識
已千歲蜀守來觀只兩株離立栽栽同壯士側身東望
拱皇都

蜀中廣記卷六十三

欽定四庫全書

蜀中廣記卷六十四

明 曹學佺 撰

方物記第六

食饌

山海經曰西南黑水之間有都廣之野后稷葬焉爰有
膏黍膏稷補註云蜀人種稷於深山中以釀郫筒酒間
以作飯也

揚雄益州箴曰有稷有稻自京徂畛民攸溫飽其蜀都賦則云五穀馮戎瓜瓠饒多矣

華陽國志曰綿竹縣劉焉初所治綿與雒各出稻稼畝收三十斛有至十五斛又曰江州縣北有稻田出御米賈逵曰梁香米也蜀本梁州出香米謂之竹根黃按穀名有檉木紅蔬名有老鶯菌者皆蜀中之佳號

戎菽蜀人所謂胡豆也志云蜀人得種於羌戎故名又云即蚕豆多食傷腎而面黑黃山谷戎州荅李任道謝

分豆粥詩云豆粥能驅晚瘴寒與公同味更同餐安知
天上養賢鼎且作山中煮菜看益州方物略曰佛豆粒
大而堅農夫不甚種唯園中蒔之以鹽漬食小兒所嗜
也贊曰豐粒茂苗豆別一類秋種春斂農不常蒔又云
紅豆花白實若大紅豆葉如冬青蜀人以爲果飣贊曰
葉圓以澤素藟春敷子生莢間累累綴珠

陸游云豌豆之不實者其葉名巢菜蜀以爲蔬廣志曰
朱提有秬豆花紫苗似小豆可爲麪云

巴志三峽兩崖土石不分之處皆種燕麥春夏之交黃
遍山谷土民賴以充食蜀人言食燕麥後嚙水能令下
泄一名油麥漂之可作麪

宋皇祐初彭山縣上瑞麥圖仁宗曰朕嘗禁四方獻瑞
今得西川麥秀圖可謂真瑞矣其賜田夫束帛以勸淳
熙九年夔州進士陳謙亨進瑞麥其穗二十六有三岐
者太守閩中林栗圖而贊之曰淳熙天子御圖三七協
氣所鍾嘉禾乃出巴夔之山亘連阡陌或兩其岐或六

其脊惟是西門近郊所植六六同穎函三爲一茲誠初
見圖寫漏逸乃知人爲不逮天力上方寅畏擯華務實
臣不敢獻私志於室采詩之官汗青之筆編諸詩書示
此其質

范成大東郊觀麥苗詩去歲秋霖麥下遲臘殘一雪潤
無泥相將飽喫滹沱飯來聽林間快活啼

揚雄蜀都賦有芍藥之羹甘馥之和方輿勝覽廣安軍
有十似若所謂金羹玉飯非溢美也

王隱晉書郵縣王長文字德叡州辟別駕佯狂不就乃微服竊出至成都市中蹲地啣胡餅白傅忠州寄胡餅與楊萬州詩胡麻餅樣學京都麪脆油香新出爐寄與飢饒楊大使嘗看得似輔興無王蜀時有趙雄武者號趙大餅出典名郡爲一時富豪嚴潔奉身精於飲饌居常不使膳夫六局之中各有二婢執役當厨者十餘輩皆著窄袖鮮潔衣粒事一食邀一客必水陸俱備雖王侯之家不得相倣能造大餅每三年麪擽一所大如數

間屋或大內宴聚或豪家有廣筵多於獨盛內獻一所
裁割用之皆有餘矣雖懿親密分莫知櫛造之法以此
得名

少陵詩西歷青羌坂南留白帝城於菟侵客恨秬粳作
人情註云峽人以蜜煎餅謂之秬粳江南謂之膏環也
山谷年譜紹聖三年五月弟知命攜一妾一子及山谷
子相相之母將抵黔南山谷與書云初五日宿大浩初
六日可來趵疊石早飯又云今日甚思汝輩同剥粽子

也又有帖云昨仲牖過此盛稱亞室之秀慧纖濃合度
笑語不可忘女紅尤妙公濟來又言作瓠羹極道地故
奉麪一石作瓠羹也一噓按此帖在戎州見本志

蜀都賦曰麪有枕榔寰宇記播州岫町縣有枕榔木可
以爲麪百姓資之宋新繁梅摯登成都普賢閣觀枕榔
詩曰他年薄宦守西甌一瞬流光二十秋今見枕榔兩
嘉樹恍如重到海邊遊太守王素和云聞說枕榔南海
頭移來西蜀屢經秋自緣賦得詩情苦不覺攀條憶舊

遊

古記云大饑不饑蜀有蹲鴟史記蜀卓氏之先趙人秦
破趙遷卓氏夫婦推輦而行曰吾聞岷山沃野下有蹲
鴟乃求遠遷致之臨邛揚雄蜀都賦曰聞蹲鴟之沃野
則以爲世濟陽九注云濟人飢也葉似蹲鴟華陽國志
曰汶山郡都安縣有大芋如蹲鴟諺曰富何卒耕水窟
貧何卒耕水窟言芋田能貧能富也顏氏家訓梁有權
貴讀蜀都賦注解蹲鴟芋也以爲羊字後有餉羊肉者

即答書云損惠蹲鴟舉朝驚駭不解事義寰宇記雲安有瓜疇芋區區以薯蕷疇以貫瓜皆伏草根也瓜疇芋區本於左賦方物略云蜀芋多種以赤鷄爲最俗號赤鷄頭形長而圓但子不繁衍又有蠻芋亦美其形圓而子蕃人多蔣之最下爲搏果芋搏接也言可接果山中人多食之本草有青紫白真蓮禪野六種惟野不堪食贊曰芋種不一赤鷄則貴民儲于田可用終歲范蜀公詩白巖霜重紅梨曉銀礫烟深紫芋秋按銀礫村名在

犀浦出芋圓而佳與他產異東坡詩朝行犀浦催收芋
是矣廣志曰蜀漢既繁芋民以爲資凡十四等君子芋
大如斗魁又如杵蓀草殼芋鋸子芋勞巨芋青泥芋此
四等多子淡善芋魁大如瓶少子葉如繖蓋紺色紫莖
長丈餘可作羹臠微澁得飲乃下蔓芋緣枝生大者次
二三升鷄子芋色黃百果芋魁大子繁畝收百斛種一
百畝以養彘早芋七月熟九面芋大而不美象空芋大
而弱食易飢青芋素芋皆不可食

揚雄蜀都賦五肉七菜勝飫腥臊故梁昭明啓曰吳愧
千里之尊蜀慚七菜之賦也劉賓客嘉話云諸葛所止
令兵士種蔓菁取其纔出甲可生啗也葉稍舒可煮食
也久居隨以滋長也棄去不足惜也回則易尋而採之
也冬有根可斷食也比諸蔬屬其利不亦溥乎三蜀人
今呼爲諸葛菜

高力士感巫縣薺菜詩兩京作斤賣五溪無人採夷夏
雖有殊氣味終不改

本草益州有苦菜乃是苦識即龍葵也寰宇記益州舊貢龍葵桐君藥錄曰苦菜三月生扶疎六月花從葉出莖直花黃八月實黑實落而根復生凌冬不枯方物略真珠菜戎瀘等州有之生水中石上翠縷纖蔓首如貫珠蜀人以蜜熬食之或以醢煮可行數千里不腐也贊曰植根水中端若串珠皿而淪之可以代蔬

本草蜀人謂薇爲巢菜蔓生莖葉氣味皆似豌豆其藿作蔬入羹皆宜東坡元脩菜詩序菜之美有吾鄉之巢

故人元脩嗜之元脩云使孔北海見當復云吾家菜耶
因謂之元脩菜余去鄉十五年思而不得見元脩適自
蜀來見予於黃乃作詩使致其子種之東坡之下摠志
巢菜葉似槐而小子如小豆夏時種以糞田其苗可食
齊民要術云蜀芥葉臺取其葉者皆七月半種地欲糞
熟蜀芥一畝葉臺一畝種法與蕪菁同既生亦不鋤之
十月後足霜乃收取其子者則二三月好雨澤時種早
則畦種水澆五月熟而採之

益州記云綿竹東武山有江池出白蓴冬夏帶絲肥美
爲一州最地圖記云是諸葛亮池中物宋元嘉中刺史
陸巖嘗取以獻

高僧傳云綿州淨慧寺僧惠寬出家在寺其寺近池人
多捕魚爲業寬與授戒且曰爾輩不當如此爲給吾能
令汝所得不失於舊因指其池畔盡生菌蓴漁人採之
省力得利與魚同後人因呼爲和尚蓴也

蜀都賦樊以蘓圃蘓草名廣蒼云載者蘓也文選注云

土茄覆地而生根可食蜀人謂之香蕓黃魯直謝楊履
道送銀茄四首藜藿盤中生精神珍蔬長帶色勝銀朝
來鹽醯飽滋味已覺瓜瓠漫輪囷又君家水茄白銀色
殊勝壩裏紫彭亨蜀人生疎不下箸吾與北人俱眼明
又白金作顆非椎成中有萬粟嚼輕冰戎州夏畦少蔬
供感君來飯在家僧又畦丁收盡垂露實葉底猶藏十
二三待得銀包已成穀更當乞種過江南天社任淵註
云椎成漢劔名蓋借用耳茄之老者其子堅黑如穀

漢犍爲郡不狼山出鼈水入沅有野生薜可食按司馬相如傳薜莎註云薜蘿蒿也水草名

瑯嬛記云猿啼之地巖乃多有每一聲遽生萬莖今峽人以爲粉用作餅飫東坡送蜀僧去塵詩拄杖挂經須倍道故鄉春巖已闌干丹鉛錄云黃山谷有巖牙初長小兒奉以爲奇句然太白詩已有不知行徑下初奉幾枝巖之句矣

廣志曰蜀地溫食瓜至冬熟有秋泉瓜秋種亦冬熟齊

民要術云取白米一斗鏹中熬之以作糜下鹽使鹹淡適口調其寒熱拭瓜以投其中蜜塗甕此蜀人方美好陸機瓜賦云桂髓起于巫山矣寰宇記雋州有斯難樹生子如瓜味酸可生食

別錄曰五木耳生犍爲山谷六月多雨時采即暴乾山海經曰崂山其草多薤韭酉陽志云邑梅長官司南八里韭山昔有遺韭種子山頂長丈餘四時茁茂夷人刈食之何少卿子應詩梁山薤黃妙天下玉筍金釵盈大

把其色鮮黃味美脆

巴南山川記有石蒜石蔥馬湖志元時馬湖蠻貢獨本
蔥

呂氏春秋曰和之美者蜀郡楊樸之薑註云楊樸地名
梁山志治北十五里高梁山壤黃而腴其人業樹薑衣
食取給焉

漢書武帝使唐蒙諷曉南越食蒙以蒟醬謂從西北牂
牁江來故曰蒟醬竹杖則開牂牁越舊也正義曰蒟

似穀葉如桑以葉作醬酸美顏師古曰亦名浮留似萆
撥嶺南取葉和檳榔食之嵇含南方草木狀云蒟醬萆
蒻也大而紫曰萆蒻小而青曰蒟可以調食故曰醬丹
鉛錄云今永昌人猶以萆蒻爲豉方物略蒟出渝瀘茂
威等州葉如王瓜厚而澤實若桑椹緣木蔓生子熟時
外黑中白長三四寸以蜜藏而食之辛香能溫五藏或
用作醬善和食味贊曰蔓附本生實若椹纍或曰浮留
南人謂之和以爲醬五味告宜按蜀記曰扶留木根大

如箸又似柳根有蛤名古賁生水中燒以爲灰曰牡蠣粉先以檳榔著口中又取扶留藤一寸古賁灰少許同嚼除胸中惡氣韻府蒟葉如桑子如葑玩之近是但今人不解爲醬而以爲麴寰宇記有蒟醬山在故都濡縣今之彭水也

常璩巴志云蔓有辛蒟園有芳蒟蜀都賦其圃則有蒟蒻菜黃註云蒻草也其根名蒻頭大者如斗其肌正白以灰汁煮則凝以苦酒淹食之蜀人是珍本草蒟蒻出

蜀中施州亦有之呼為鬼頭益州記云蜀人以冬月取
蒟蒻舂碎炙之水淋一宿為蒟

禮記註藪音藪煎茱萸也爾雅謂之檳色八切廣雅檳
檳欖越椒茱萸也一名藪根東南行者勝子至九月九
日氣烈而熟故俗至是日折以辟惡氣又有名食茱萸
者其本高大至百尺餘枝莖青黃上有小白點葉類油
麻花黃蜀人呼其實為艾子即藪音之訛也戎州志土
人以艾子為油樹高數丈子如茱萸糜之而取其汁烹

蔬筍味辛香方物略艾子實正綠味辛蜀人每進羹臙
以一二粒投之少選香滿盃或曰作爲膏尤良按揚
雄蜀都賦作藪藪艾同音云贊曰綠實若萸味辛香苾
投粒羹臙椒桂之匹

本草邛州有醋林子類櫻桃而蒂短其葉味酸采得入
鹽和魚鱠食云勝用醋也廣志曰蜀名梅爲蓀大如雁
子梅蓀皆可以爲油黃梅以熟蓀作之蓀音老按周禮
饋食之遷其食乾蓀食經曰蜀中藏梅法取梅極大者

剥皮陰乾勿令得風經二宿去鹽汁內蜜中月許更易
蜜經年如新也

任淵云眉之野人或食虺蜥史應之嘗爲童子師落魄
無檢喜作鄙語人以屠僧目之山谷先生至眉以詩戲
之云先生早擅屠龍學袖有新硯不試刀歲晚亦無鷄
可割庖蛙燭蜺薦松醪一本燭蜺作煎鱖前輩詩來朝
爲送先生飯一夜沿溪捉鱖魚蓋以館師及屠僧爲嘲
耳

魏略云新城孟太守道蜀猪豚鷄鶩味皆淡故蜀人作
食喜煮飴蜜以助味太守孟達也陸游云某族伯父彥
遠言少時識仲殊長老東坡爲作安州老人食

原闕

食皆蜜也豆腐麪觔牛乳之類皆

用蜜漬客多不能下飮惟東坡亦酷嗜蜜能與之共飽
也

蜀都賦云蜜房郁毓被其阜山圖采而得道華陽國志

宕渠縣有石蜜宿山圖所采也本草石蜜出益州及西戎煉砂糖爲之成餅塊有黃白色寰宇記茂集達三州產蜜資州產甘蔗容齋隨筆云糖霜之名唐以前無所見自古食蔗者始爲蔗漿宋玉招魂所謂飴鼈魚羔有柘漿是也其後爲蔗錫孫亮使黃門就中藏吏取交州獻甘蔗錫是也後又爲石蜜南中八郡志曰榨甘蔗汁曝成飴謂之石蜜本草亦云煉糖和乳爲石蜜是也後又爲蔗酒唐赤土國用甘蔗作酒雜以紫瓜根是也唐

太宗遣使至摩揭陀國取熬糖法即詔揚州上諸蔗榨
瀋如其劑色味愈於西域遠甚然只是今之沙糖蔗之
技盡於此不言作霜然則糖霜非古也歷世詩人模竒
寫異亦無一章一句言之唯東坡過金山寺作詩送遂
寧僧圓寶云涪江與中泠共此一味水冰盤薦琥珀何
似糖霜美黃魯直在戎州作頌答梓州雍熙長老寄糖
霜云遠寄蔗霜知有味勝於崔子水晶鹽正宗掃地從
誰說我舌猶能及鼻尖則遂寧糖霜見於文字者實始

二公甘蔗所在皆植獨福唐四明番禺廣漢遂寧有糖
冰而遂寧爲冠四郡所產甚微而顆碎色淺味薄纔比
遂之最下者亦皆起於近世唐大厯中有鄒和尚者始
來小溪之緞山教民黃氏以造霜之法緞山在縣北二
十里山前後有蔗田者十之四糖霜戶十之三蔗有四
色曰杜蔗曰西蔗曰芳蔗本草荻蔗也曰紅蔗本草崑
崙蔗也紅蔗止堪生噉芳蔗可作沙糖西蔗亦可作霜
色淺土人不甚貴杜蔗紫嫩味極厚專用作霜凡蔗最

困地力今年爲蔗田者明年改種五穀以息之霜戶器
用曰蔗削曰蔗鎌曰蔗斃曰蔗碾曰榨斗曰榨牀曰漆
甕各有制度凡霜一甕中品色亦自不同堆疊如假山
者爲上團枝次之甕鑑次之小顆塊次之沙脚爲下紫
爲上深琥珀次之淺黃又次之淺白爲下宣和初王黼
創應奉司遂寧常貢外歲別進數千斤是時所產益奇
牆壁或方寸應奉司罷乃不再見當時因之大擾敗本
業者居半久而未復遂寧王灼作糖霜譜七篇且載其

說子採取之以廣聞見按遂寧志唐有鄒和尚者乘白
驢來寓遂寧傘子山之民素以種蔗凝糖爲業驢常
食其蔗民苦之告于師師曰汝知蔗之爲糖而不知糖
之爲霜也因教以爲糖霜世稱絕品

藥石

司馬相如凡將篇有烏喙桔梗荒華欵冬貝母木檉蔓
苓草芍藥桂漏蘆蜚廉藿菌薜託白欽白芷菖蒲芒硝
莞椒茱萸

譙周巴蜀異物志文章草贊曰文章作酒能成其味以
金買草不言其貴北堂書鈔云異物志楊孚作未詳按
文章草即今五加皮也本草惟蜀產者佳一名白棘顛
一名文章草陶隱居云釀酒益人東華真人煮石經云
舜登蒼梧之山曰厥金玉之香草朕庸偃息正道此也
又名金鹽母王屋山人王常曰欲得長久何不食石蓄
金鹽母諺曰若得一把五加不用金珠滿車今蜀人呼
爲白茨葉

蜀都賦靡蕪布濩於中阿本草芎藭出蜀中者爲川芎
宋祁方物略曰芎蜀中處處有之葉名靡蕪楚辭所謂
江離也其根爲芎似雀腦者善成都九日藥市芎與大
黃如積香溢于廛或言其大若胡桃者不佳人多蒔於
園檻葉落時可用作羹蜀少寒莖葉不萎今醫家最貴
川芎川大黃云贊曰柔葉美根冬不隕零采而掇之可
糝于羹

蜀都賦云或蕃丹椒注曰岷山多藥草椒尤好異于天

下寰宇記黎州產紅椒即丹椒也入貢本草茂州椒其殼一開一合爲佳即岷山界又云蜀椒生於巴郡八月采實陰乾范子計然曰蜀椒出武都山赤色者佳爾雅檄木椒按叢生實大者爲檄樹如茱萸有刺葉堅而滑澤蜀人作茶皆合煮其葉以爲香

寰宇記巴豆嘉眉戎皆有之眉州入貢本草云樹高一二丈葉如櫻桃而厚初生色青後漸黃赤四月舊葉落盡新葉生齊花成穗色微黃五六月結實作房至八月

熟類白豆蔻漸漸自落乃收之一房二瓣一子或三子
子有殼戎州出者殼上有縱文隱起如線一道或兩三
道士人呼爲金線巴豆雷公云使巴與豆及剛子須詳
認誤則殺人巴顆小緊實色黃豆則顆有三稜色黑剛
子顆小似棗核兩頭尖則巴與豆又二物也又蜀都賦
有巴菽巴戟廣雅曰巴菽即巴豆巴戟者巴戟天也寰
宇記果劔巴夔忠皆產劔州者貢志云龍州宣撫司南
十里藥叢山上產巴戟

本草羌活出蜀漢者佳春生苗葉如麻六月開花作叢
結實時葉黃者是夾石中生葉青者是土脉中生寰宇
記翼保威榮威悉當松諸州皆產宋史載威州者貢志
云威茂之間有羌活山昔用兵時於此放羌戎數百其
後山谷中產皆因以爲名

蜀漆者常山之苗裔本草常山生益州山谷二八月采
其根陰乾用寰宇記渠縣產常山

本草附子生犍爲山谷及廣漢冬月采春采則爲烏頭

寰宇記梓州舊進兩熟烏頭能改益漫錄載綿州十子
附子是其一也方物略云附子生彰明縣有重及一兩
者花色紫本草言附子無正種附烏頭而生然則與烏
頭天雄共一物耳陶弘景以天雄烏頭附子皆出建平
謂之三建唐人非之以綿龍二州所生爲良今則彰明
者佳贊曰附莖而生翠莖紫莖生蜀者良王建則非寰
宇記龍安縣松嶺關之東四十里有山出附子因名附
子山附子水出焉又云龍州產附子宋史政州者貢即

龍州也

本草金櫻子蜀人熬作膏入酒補治有殊効又云續隨子蜀郡處處有之苗如天戟一名百兩金寰宇記陵州今貢續遂子以端午采者佳又云嶺州出五味子汶山縣東十八里有五味山以藥名也開州志唐貢車前子張籍答韋開州詩云開州五月車前子作藥人皆道有神慚愧使君憐病眼三千餘里寄閒人

蘇文忠集青城山老人村有見五世孫者道極險遠生

不識鹽醢而溪中多枸杞根如龍蛇飲其水故壽近歲
道稍通漸能致五味而壽亦益衰

本草藥子蜀中多有之忠萬者勝寰宇記巴渝集達皆
產或稱黃藥或白藥或苦藥或木藥不同按大厯中黎
幹爲京尹奏忠州有苦藥子性寒解一切熱毒撰方以
進於是爲常貢焉文獻通考合州巴川郡唐時貢藥子
二百顆永貞二年皆停宋史萬合二州梁山縣仙井監
皆貢藥子

蜀都賦風連延蔓於蘭皋註云風連出岷山及廣都漢末李當之本草黃連惟取蜀郡黃肥而堅者爲良寰宇記榮雅渠忠利五州皆產

宋子京云大黃蜀山多有之苗根長盈二尺予在藥市所見大者形似牛舌而緊緻有紫地錦文可治爲枕唐人以爲產蜀者佳贊曰葉大莖赤根若巨皿治疾則多方家所詔寰宇記果瀘恭當拓五州皆產

蜀本草圖經黃蘗樹高數丈葉似吳茱萸又如紫椿經

冬不凋皮外白裏深黃色其根結塊如茯苓出夔合州山谷中

益州張詠進獐蕨丸表云切以餐石飲水可作充腸之饌餌松含栢亦成救病之功是以療飢者不在於珍羞愈病者何煩於異術不恥管窺輒干天聽臣因換龍興觀掘得一碑上刻修養術并藥方二件依方訪問采覓其草金稜銀線素莖紫芝對節而生形同蒼耳不費登高歷險每常求少獲多急採非難廣收甚易倘勤久服

旋見神功臣自進百服而眼目清明千服而鬚鬚烏黑
筋力輕健效驗多端本州有都押衙羅守一因中風墜
馬失瘡不語臣與十服其病立瘥又和尚智嚴年七十
忽患偏風口眼喎斜臣與十服亦使得痊謹合一百劑
差職史史元秦進

寰宇記天麥門冬忠州出宋史新編普州順慶皆貢天
門冬梁簡文謝賚益州天門冬啓建自星橋見珍玉壘
本草稱其輕身延壽實爲上藥姬晉之重丹桂曹丕之

愛落英一蒙恩賜竊幸往代張世南游宦紀聞向在蜀
見製麥門冬法古用湯泡少時則易去心今只以銀石
銚火上微烙隨手漸剝極易爲力又不漬去藥味又乳
香沒藥最難研若作丸以乳鉢研略細入酒或水研之
頃刻如泥更無滓脚酒糊則用酒研麪糊則用水用力
省而不飛耗

寰宇記閬翼威當悉恭拓諸州皆出當歸宋史威州貢
本草當歸川蜀畦種肥好多脂不以平地山中爲等差

峽人謂之文無按崔豹古今注云古人相贈以芍藥相
招以文無文無當歸也芍藥一名將離孫盛雜記曰初
姜維詣諸葛亮與母相失後得母書令求當歸維答書
曰良田百頃不在一畝但有遠志不在當歸神僧傳唐
玄宗問一行國祚幾何有留難否對曰鑾輿有萬里之
行帝驚問其故不答退以小金合進署曰至萬里即開
帝一日發合視之蓋當歸少許及祿山亂駕幸成都至
萬里橋乃悟未幾果歸

方物略燭麻劔南處處有之觸其葉則如蜂螫以溺濯之即解莖有刺葉或青或紫治風腫贊曰葉能螫人有花無實冒冬弗悴可以祛疾按杜工部有除璫草詩璫音燭蜀名璫麻寰宇記麻山有麻能解瘴毒本草升麻生益州山谷寰宇記出茂戎彭雅之間

方物略金星草莪眉青城山俱有之葉似萱其背有點雙行相偶黃澤類金星故名亦云金釧草醫家以傳疽創甚良贊曰長葉叢生背點星布高醫近識傳疽可愈

按此草解癰疽及丹石毒與喉生乳蛾搗水飲之即愈
本草以戎州者爲上喜生背陰石上淨處及竹箐中少
日色處或生大木下及古瓦屋中初出深綠色葉長一
二尺至冬背生黃星點子兩兩相對色如金無花實凌
冬不凋其根盤屈如竹根而細折之有觔如豬馬駿
本草夏枯草生蜀郡川谷冬至後始葉似旋覆三四月
開花作穗紫白色似丹參花結子亦作穗五月便枯今
蜀人用以煎水盪面不皴

彰明志縣東二十九里有豆草山九州記云山有北芒
神生豆草草

新津志縣南八里有山生稠稭草服之長生

本草經曰合歡味甘平生益州川谷安五臟和心志令
人歡樂無憂久服輕身明目

寰宇記果州有鷄父草五月採山大豆八月採豆療急
風傷寒草治因產破血二藥本草不書也本草山豆根
以忠萬者爲佳苗蔓如豆葉青經冬不凋

寰宇記遂嘉二州有紫葛根宋史嘉州者貢按本草葛根生汶山山谷中

本草伏牛花生蜀地葉青細似黃蘗而不光莖有刺花
色淡黃穗似杏花而小又云蜜蒙花蜀中州郡皆有之
樹高丈餘葉似冬青而厚背白有毛

寰州記紅花紫草蜀州皆有之今崇慶州也又云嘉州
古貢紅花

通考牡丹皮唐時巴川郡歲貢十斤寰宇記廣安軍渝

合皆出渝合者貢巴川隸合州也又云蜀州貢木蘭皮
蜀都賦云菌桂臨崖本草菌桂圓如竹爲衆藥通使一
名菌薰葉曰蕙根曰薰

水經注巴東舊郡治故陵溪西二里故陵村即永谷也
地多木爪樹有子大如鰕白黃實甚芬香爾雅之所謂
楸也

資州圖經曰生瓜菜產平田陰畦間苗長三四寸叢生
葉青圓似莧花葉白實細黑味作生瓜氣取莖葉自然

汁傳胎腫毒及治走注傷寒利胸膈

方物略石瓜生峨眉樹端挺葉肥滑如冬青椹似桑
花色淺黃實長不圓殼解而子始見以其形似瓜故名
煮爲液治痺贊曰脩翰澤葉結實如綴膚解核零可用
治痺

本草檠菜一名白英味甘寒生益州山谷治寒熱久服
輕身延年檠音谷

寰宇記松州有松桑嶺其上多甘松潘志甘松嶺在

治西北三百里產甘松處也

蜀都賦鬱金生蜀地及西戎苗似薑黃花白質紅未秋
出莖心而無實其根黃赤寰宇記資州產高良薑通志
戎州出黃精薑韋應物餌黃精詩靈藥出西川服食採
其根九蒸換凡骨經著上世言候火起中夜馨香滿南
軒齋居感衆靈藥術啓妙門自懷物外心豈與俗士論
終期脫印綬永與天壤存

南充志縣北二十里清山亦名小龍門懸崖上有草謂

之堯韭可以瘳疾

方物略海芋高四五尺葉似芋而有幹及根皮不可食
方士家號隔河仙可用變金或云止瘧贊曰木幹芋葉
擁踵盤戾農經弗載可用治癰

文與可有子平寄惠希夷先生所傳唐福山藥方戲作
長歌謝之歌云蜀江之東山色盡如赭有道人云此是
丹砂伏其下煙雲光潤若洗濯澗谷玲瓏如刻畫我聞
神仙草藥不在凡土生是中當有靈苗異卉之根莖果

然人言所出山芋爲第一西南諸郡有者皆虛名就中
唐福衆稱賞肥實甘香天所養有時品頭倒垂三尺壯
士臂忽然洞口直舉一合仙人掌土人入冬農事閒千
簞萬鍾來此山可憐所鬻不甚貴著價即售曾不慳往
年子瞻爲余說言君部內此物尤奇絕後復寄書勸我
當餌之滿紙親題華嶽先生訣予因購之不惜錢依方
服餌將二年其功神聖久乃覺筋牢體溢支節堅自問
丹霄幾時上早生兩翅教高颺

敘志州西北二里仙侶山有一泉五洞上產仙茅宋楊道人昇仙于此名楊仙洞

南江志縣南二里菖蒲澗產九節菖蒲寰宇記雅安產石菖蒲

禮含文嘉曰夏以姒祖感薏苡而生按岷山多薏苡近石泉界也

本草石香薷生蜀郡陵榮資簡巖石縫中二八月采苗莖花實俱可用又云三稜狀如烏梅而稍大體輕有鬚

相連蔓延作漆色蜀人織以爲器一名琴

范成大詠蜀紫荷車詩綠英吐弱線翠葉抱脩莖如
青旄節草中立亭亭根有却老藥鱗皴友松苓長生不
暇學聊冀病身輕

博物志曰胡蘓本出洛中有驅羊入蜀者著子于毛蜀
人取而種之因名羊負來本草羊泉生蜀郡山谷俗名
漆姑葉似菊花紫色子類枸杞根如遠志無心有糝又
云鹿藿生於汶山

寰宇記導江縣貢藥有紫背龍牙白背龍牙大鶴仙小
鶴仙嘉州有金毛狗脊有丁公藤夾江志地出王不留
行

稽聖賦云竹布實而根苦蕉舒花而株槁蕉甘蕉也蜀
人謂之天苴即天麻

史記巴蜀寡婦清之先得丹穴擅其利數世家亦不貲
華陽國志涪陵巴之南鄙出丹漆又云丹興縣出名丹
蜀都賦丹砂赭熾出其坂註丹興漢葭二縣並出本草

丹砂生符陵山谷光色如雲母陶隱居云符陵是涪州志林云爾朱道士晚客於眉山自言受記於師云汝後遇白石浮當飛仙去爾朱雖以此語人自亦莫識所謂後客涪州愛其地產丹砂雖瑣細而皆矢鏃狀瑩徹不雜土石遂止鍊丹數年竟於涪州白石仙去長老道其事甚多然不記名字可恨通考云唐黔州黔中郡貢朱砂十斤寰宇記黔州出水銀本草言水銀生涪陵平土而出於丹砂也

華陽國志梓潼郡涪縣有陽泉出石丹

范子計然曰空青出於巴郡本草空青生益州山谷久服輕身能化銅鉛作金又云蜀名山縣有銅處曾青出其陽青者銅之精也又云空青生越嶲山有銅處銅精熏則生空青其腹中空梁江淹空青賦曰夫赤瓊以照燎爲光碧石以歲蕤爲色咸見珍於東國並被貴於西極况空青之麗寶挺山海之不測於是寫雲圖氣學靈狀仙寶波麗水華峯豔山暘谷之樹崦嵫之泉西海之

草炎州之煙曲帳畫屏素女綵扇錦色霏鬱綺質蔓延
點拂濃薄如隱如見山水萬象丹青四變咸百鎰而可
珍亦千金而不賤故淹作扇上彩畫賦有空青出峨眉
之岨雌黃出嶓冢之陰

華陽國志越雋會無縣山色青碧蜀都賦所稱碧砮出
此

本草扁青生朱提繪畫家用之青翠不渝珙縣志落幹
里麻害中出青大如筋初掘其色淡乘風始變青所謂

土青也寰宇記空青出銅山縣賴應山又云梓州貢空青曾青石碌也

山海經數歷之山楚水出焉其中多白珠郭注云今蜀郡平澤出青珠按寰宇記蜀州晉原縣有豐平澤青珠是出本草石闌干生蜀郡平澤蜀都賦所稱青珠黃環者也註云黃環出蜀郡華陽國志會無縣其穴多碧珠人不可取取之不祥或即青珠也

吳百官錄云劉蜀主得賜雲母車一乘唐閭丘均爲蜀

州刺史第八息進武后雲母粉表伏按雲母者千二百
玉石之精七十二氣霧之英體華而光不爲水毀不爲
火煨夫萬物之精者神氣所會未有不化神而能長久
者也是以服食者則翱翔自任役使百靈臣肌性虛羸
少嬰疾苦務求攝理驗討方書品丹石之名徵草木之
氣前聖所錄粗知其體即味消邪厲力輔神年類非難
得之珍價無兼金之重觸疾則愈莫若茲物伏惟越古
金輪聖神皇帝陛下福德所符天祚攸久豈假上藥方

固南山然一日萬幾或煩聖慮色力營衛必有相資臣
從西山野人得其良者其色多白乃是雲液臣不揆拙
昧輒採古仙要方量事施藝翦棄粗類收聚輕英開潔
清之所遠淹穢之迹浸以茅露洮以東流曠日彌時然
後功就果得光潤融爛質理研微試之柔膚隨手化滅
皆云所見未始相侔臣意其精殊倘涉靈秘豈以凡妄
所敢飡嘗謹詣朝堂敢冒死封進伏希陛下兼愛博物
受其區區不以凡人忽棄神寶無任下情

雲安縣舊圖經縣北三十里白玉池產太乙元精石張
華博物志蜀牙門山東峯有石穴深數里出鍾乳郡國
志曰彰明縣黃巖山有鍾乳穴十九珙縣東五里鳳頭
山有石磧中出石燕石螺石筍石蜉蝣等形晴日久曝
雷雨偶作則石燕各彙脫出俗謂乘雨飛動止復爲石
也按石燕能治目固齒寰宇記渝合二州出石膽

華陽國志五成縣山出龍骨云龍升其山值天門閉不
達墮死於此後沒地中故掘取得龍骨寰宇記玄武山

一名三嵎山在本縣東二里六屈三起多龍骨

寰宇記茂州今貢麝臍霸松恭拓當悉靜諸州皆有之
有麝散麝之分

蜀都賦有碧砮芒硝註芒硝出蜀都廣陽山本草朴硝
出益州汶山蠶陵二縣界山崖上色青白亦有雜黑斑
者寰宇記益州舊貢雪山朴硝色白如玉又云茂州產
馬牙硝悉州亦產威遠志縣出土硝居民以之糞田焉
方物略云水硫黃出資榮山礪中秋潦已收布茅水上

取其聚沫熬之復投于水即成號真珠黃以淺黃者爲上其用次於海舶來者贊曰厥生在石水蕩其液觸梗凝體品亞南舶榮縣志北十里有硫黃嶺圖經所稱威榮出硫黃處也

蜀中廣記卷六十四